

## Úrskurður

Agamál nr. 51/2018-2019

<b>Viðburður:</b>	Leikur Njarðvíkur gegn ÍR í átta -liða úrslitum Íslandsmóts mfl. kk. sem leikinn var 1. apríl 2019.
<b>Kærði:</b>	Ungmennafélag Njarðvíkur
<b>Kærendur:</b>	Dómarar leiksins

### Málavextir

Hinn 2. apríl 2019 barst aga- og úrskurðanefnd atvikaskýrsla dómara eftir framangreindan leik, sbr. 1. mgr. 6. gr. reglugerðar um aga- og úrskurðarmál (hér eftir reglugerðin). Í skýrslunni kemur fram að undir lok leiks hafi meðlimur stuðningsmannasveitar Njarðvíkur kastað trommukjuða af afli í fætur leikmanns ÍR af fremur stuttu færi. Meðfylgjandi var myndbandsupptaka af hinu kærða atviki og eru lýsingar í atvikaskýrslu dómara í samræmi við það sem fram kemur á myndbandinu. Óskað var eftir athugasemdum frá hinu kærða félagi en engar athugasemdir bárust aga- og úrskurðarnefnd.

### Niðurstaða aga- og úrskurðarnefndar

Samkvæmt 1. mgr. 3. gr. reglugerðarinnar hefur aga- og úrskurðarnefnd fullnaðarlögsögu yfir þeim málefnum, sem koma upp innan vébanda KKÍ og varða lög og reglur þess eftir því sem við á. Nefndin skal byggja niðurstöður sínar á lögum og reglugerðum KKÍ.

Í ákvæði h. liðar 1. mgr. 13. gr. reglugerðarinnar kemur fram að ef áhorfendur gerast sekir um vítaverða eða hættulega framkomu gagnvart leikmönnum, dómurum eða starfsmönnum eða öðrum áhorfendum leiks, er aga- og úrskurðarnefnd heimilt að svipta viðkomandi heimalið heimaleikjum og/eða úrskurða það til greiðslu sektar til Körfuknattleikssambands Íslands að mati nefndarinnar. Ef atvik þykja ekki það alvarleg að svipting leikja verði úrskurðuð, er aga- og úrskurðarnefnd heimilt að áminna viðkomandi félag og/eða gera ábendingar er lúta að tryggja öryggi aðila og dómara. Verði um ítrekuð brot að ræða innan keppnistímabils þrátt fyrir áminningu, og ekki hafi verið orðið við ábendingum aga- og úrskurðarnefndar, skal svipta viðkomandi lið að lágmarki tveimur heimaleikjum. Aga- og úrskurðarnefnd skuli meta heimaliði til málsbóta ef sannað þyki að áhorfendur útiliðs hafi átt upptök að, eða stærstan þátt í, hinni kærðu framkomu. Aga- og úrskurðarnefnd skuli meta heimaliði það til málsbóta, ef öryggisgæsla teljist hafa verið nægjanleg. Þá segir í m. lið sama ákvæðis að ef forystumaður aðildarfélags, sem ekki er á leikskýrslu, eða áhorfandi gerist sekir um vítaverða eða hættulega framkomu gagnvart

leikmönnum, dómurum, þjálfurum eða öðrum sé heimilt að sekta viðkomandi aðildarfélag um allt að kr. 50.000. Ef brot teljist alvarlegt eða um ítrekun er að ræða sé auk þess heimilt að setja viðkomandi lið í heimaleikjabann, þar til öryggi leikmanna, þjálfara og annarra teljist tryggt. Enn fremur segir í ákvæði 7. gr. reglugerðar um körfuknattleiksmót að félög beri ábyrgð á því að framkvæmd heimaleikja þeirra fari fram á eðlilegan hátt. Í því felst m.a. að tryggja öryggi leikmanna, dómara og annarra starfsmanna leiksins og áhorfenda.

Aga- og úrskurðarnefnd telur háttsemi viðkomandi áhorfanda í umrætt sinn mjög alvarlega. Slík háttsemi telst að mati nefndarinnar til vítaverðrar og beinlínis hættulegrar framkomu sem á engan hátt er hluti af leiknum. Er það mat nefndarinnar að hið kærða lið skuli hljóta áminningu vegna hins kærða atviks og greiða sekt til Körfuknattleikssambands Íslands. Hvað varðar heimild til að setja hið kærða lið í heimaleikjabann á grundvelli framangreindra ákvæða telur nefndin að gæta verði meðalhófs við beitingu svo íþyngjandi úrræðis, þrátt fyrir alvarleika málsins, en einnig telur nefndin að almennt sé rétt að beita þyngri viðurlögum þegar um ítrekun er að ræða. Í þessu sambandi vill nefndin einnig að vísa til þingsályktunartillögu sem samþykkt var á körfuknattleikspingi Körfuknattleikssambands Íslands hinn 16. mars sl. Samkvæmt þeirri tillögu ber stjórn Körfuknattleikssambandsins að bæta inn í viðeigandi reglugerðir úrræðum til að takast á við óviðeigandi hegðun áhorfenda á leikjum. Þar kemur einnig fram að nauðsynlegt sé að Körfuknattleikssamband Íslands geti tekið á málum einstakra áhorfenda og/eða hópa sem þykja hafa gengið of langt í hegðun sinni. Núverandi úrræði séu ekki nægilega víðtæk og því sé nauðsynlegt að bæta regluverkið. Með vísan til þess sem að framan er rakið hlýtur hið kærða lið áminningu vegna hins kærða atviks og skal greiða sekt að fjárhæð kr. 50.000 til Körfuknattleikssambands Íslands.

#### **Úrskurðarorð**

Hið kærða lið, Njarðvík, sætir áminningu og skal greiða sekt til Körfuknattleikssambands Íslands að fjárhæð kr. 50.000 vegna háttsemi áhorfanda liðsins í leik Njarðvíkur og ÍR í átta - liða úrslitum Íslandsmóts meistaraflokks karla sem leikinn var þann 1. apríl 2019.

Reykjavík, 10. apríl 2019

**Þórólfur Heiðar Þorsteinsson, formaður**

**Björgvin Halldór Björnsson, varaformaður**

**Hrefna Dögg Gunnarsdóttir, varaformaður**

**Birkir Guðmundarson**

**Kristinn G. Kristinsson**

**María Káradóttir**